

Frisia Occidentalis.

Regio & unde
dicta.

Frisia Occiden-
talis.
Situs.

Caeli temperies.
Soli qualitas.

HAthenus in genere Germaniam descripsi: postulat Methodus, ut speciatim & per partes eam perambulem: earum omnium, quo ordine a Mercatore proponuntur, delineationem, quam potero fidelissime, proponam. Offert se primo loco Frisia Occidentalis.

Frisiam a Phrygia genitrici patriae dictam, sunt qui scribunt; alii a gelu extremo, quo ditio rigeat, nomen derivant. Abbas Spanheimus auctoritate Hunibaldi, teterrimi historicae veritatis corruptoris, a Friso Clodionis criniti Francorum Regis filio nomen accepisse fabulatur, quasi non multis ante saeculis Plinius ac Tacitus illo nomine eos noverint. Hadrianus Iunius ad libertatem, cujus studio semper flagrant, nominis fontes referendos existimat. *Frisii* autem gens antiquissima Germanorum, Romanis ob bellicas virtutes nota, nomen nunquam mutavit. Hi Tacito duplices, Majores scilicet & minores. *Majoribus*, inquit, *minoribusque Frisiis vocabulum est ex modo virum*, utraque nationes usque ad Oceanum Rheno praetexuntur, ambiuntque immensos lacus & Romanis classibus navigatos. Majores Tacito sunt *Oostfrisi* proprie dicti, non ii qui hodie illud sibi nomen usurpant *Embdani*, hi enim sunt *Chauci* minores; sed ii in quibus numerantur *Stauria*, *Sneca*, *Francum*, *Harlinga*, *Opida* & *Leovardia*. Similiter *Westfrisi* qui in extrema Hollandiae ora *Northollandi* appellantur, suntque continui *Caninefatibus* ex descriptione Pliniana: haec namque duae *Frisiorum* nationes usque ad Oceanum Rheno praetexuntur. Hodie vero dividitur Frisia *Amisi* fluvio in Occidentalem & Orientalem. *Frisia Occidentalis* sive *Westfrisia* a positu Orbis, sic hodie nuncupata quam hic ob oculos ponimus, Frisiae nomen quasi proprium sibi antiquissimo jure vendicat, semperque praestantior fuit habita. Eam a plaga mundi Occidua, & a Septentrione Oceanus ambit & littora pulsat: a Meridie Sinu amplissimo, vulgo *Zuyder-Zee*, *Trans-Isalanaeque* Provincia terminatur: ab Ortus *Solis Amisi* Fluvio praetexitur qui eam a *Busactoris* *Westphalisque* discriminat. Aer utcunque salubris est, nisi quantum paludum exhalatione inficitur, quanquam & id labis ventorum beneficio expurgatur. Estque hac tempestate Frisia Occidentalis regio longe maxima parte palustris, solo depressiore ac demerso plerisque locis, non in novum modo sed in adultum quoque ver: atque ob hanc aquarum multitudinem, Frumenti parum ferax. Inundationes enim annuae, quae praeterquam quod mature accedant, tarde etiam recedunt, sementem aut extinguunt, aut per agros omnes dissipant. Sunt tamen hic uberrima saginando Pecori ubique pascua, quorum bonitate cum aliis certare & verticem attollere Frisiis licet, unde praecipui redditus ac proventus existunt: siquidem est Caseis & Butyro, quae exportantur in externa loca, in singulos annos quantum emolumentum ad Incolas redeat, dictu vix credibile videatur, praeter ea quae in quotidianum alimentum cedunt. Tot illa Bovi armentis abundat, tam laeta Vaccarum parens ac nutrix est. Equos etiam generosos, & praestantes producit. Silvas vero etiam sialicubi habeat, haud suppetit tamen tanta lignorum copia, quae Martialis Flaccique votis responsura, perennem & larga manu exstructum focum onerare possit. Verum provida rerum parens

Natura